

WIJI KANG DAK-TANDUR

wit gayam kang manglung kali
 wis banget tuwa umuré
 tangisé bayi kang kekejer ing lingsir wengi
 banget nrenyuhaké laguné

bu-lik
 wiji kang dak-tandur
 saiki wis tukul
 ibu nggaḍang
 simbah ngudang
 pinaringan tansah lestari tukulé
 dadi pangayoman lan palereman
 putra wayahé ing tembé

ora arep dak-sirep kumandangé lagu perih iki
 senadyan nyanḍet mengané lawang kaswargan
 senadyan ngagolaké wengi-wengi pinaès lintang
 pancèn ngéné sejatiné urip, bu-lik
 seḍéla-seḍéla tansah manggul kekalahan
 saben wanci pracéka nantang

saupama wiji kang dak-tandur wis gedé ngrembuyung
 bakal dak-ampiraké andon-lelana kang mlaku nyanḍung-nyanḍung
 saben wengi tansah dak-lagokaké kidung
 atur panuwun marang Gusti
 kinanti pepuji

Moch. Nursjahid P.
 (in: Jaya Baya no. 38, March 1972).